

答湛持公三問 原問附

問。知之。一字。妙。禍之門。二門。同。是一知。工夫如何。下手。又此知。若有所知。對待成妄。若無所知。何所表。而云知也。又用知。知於知邪。不起知。知於知也。

始覺

答。知見立知。禍門也。知見無見。妙門也。若不達能所性空。妄計心外有法。此知即名不覺。若達心外無法。能所不二。此知即名始覺。亦名妙觀察智。亦名無塵智。此智從本體起。還照本體。雖復自照。實無能照所照。以達無二體故。名字位中。直用此智。念念體達。心外無法。法法唯心。不論時劫。不論功用。至金剛後心。永斷生相。無明始覺合本。稱究竟覺。今下手工夫。正要起知。知於知體之外。更無餘法。永嘉所謂但知而已。若不起知。知於但知。未有不隨妄能妄所者。大乘止觀。三明以何依止。中言之頗詳。

究竟覺

答。非除他物。但取於知也。以知外無法。名但知也。達得但知。則知之一字。亦是強名。原無一物。豈成所知。若有所知。又成一物。非但知矣。下手方便。強觀諸法。無實。唯是一心。隨觀心無心相。覓不可得。然後悟入。但知法門。前二方便。皆唯心識觀。初除分別性。次除依他性。悟入但知。是真如實觀。證圓成實性也。

問。摩訶止觀。初以識陰為所觀境。然能觀亦用意識。能所有何辨邪。

答。前念為能觀。後念為所觀。由能觀全用一心三觀。便知所起後念。全是一境三諦。既一境三諦。則起即無起。亦不妨無起而起。起無起名為諦。無起起名為觀。是謂諦觀。名別體復同。是故能所二非二也。